

S A M Þ Y K K T

222

9. des.

fyrir Fiskræktar- og veiðifélag Selá.**1. gr.**

Félagið heitir Fiskræktar- og veiðifélag Selá. Heimili þess og varnarþing er á Bólstað.

2. gr.

Markmið félagsins er að auka lax- og silungsveiði á félagssvæðinu og arð af henni, með því:

1. að stunda lax- og silungsklak,
2. að reka lax- og silungsveiði fyrir alla félagsmenn, sameiginlega á einum eða fleiri stöðum ef henta þykir.

3. gr.

Félagið hefur umráð yfir öllum rétti til lax- og silungsveiði í þessum vötnum: Selá og þeim vötnum, sem í hana falla. Félagsmenn eru allir eigendur og ábúendur þeirra jarða, er land eiga að nefndum vötnum, en þær eru þessar: Bassastaðir, Bólstaður, Geirmundarstaðir, Gilsstaðir, Gránanes og Kolbjarnarstaðir.

4. gr.

Óheimilt er öllum að veiða lax og silung í vötnum þessum nema með sérstöku og skriflegu leyfi félagsstjórnar. Skal þar tekið fram um veiðitíma og veiðitæki og með hvaða kjörum leyfið er veitt.

5. gr.

Heimilt er félagsstjórn að leigja ár á félagssvæðinu, eða hluta af þeim, einstökum mönnum eða félögum, til stangarveiði, ef sýnilegt þykir, að það sé hagur fyrir félagið. Þó má það leyfi eigi vera til lengri tíma en eins árs, nema lögmætur fundur samþykki og tekið hafi verið fram í fundarboði, að slíkt veiðileyfi yrði til umræðu.

6. gr.

Nú tekur félagið upp sameiginlega veiði, og ræður það þá mann til að standa fyrir veiðinni. Hann nefnist veiðistjóri.

Veiðistjóri annast um framkvæmdir félagsveiðinnar. Ræður hann menn sér til aðstoðar eftir þörfum. Hann sér um verkun og sölu á veiðinni, og færir alla reikninga þar að lútandi, allt í samráði við félagsstjórn.

7. gr.

Félagið starfrækir laxa- og silungaklak á þeim stað eða stöðum, sem félagsstjórn velur í samráði við fiskræktarráðunaut. Kostnaði við það skal jafna á félagsmenn eftir þeim hlutföllum, sem arðskrá félagsins tiltekur.

8. gr.

Stjórnina skipa 3 menn, formaður og tveir meðstjórnendur. Skulu þeir kosnir á aðalfundi til þriggja ára í senn. Ganga þeir úr stjórninni á víxl þannig: Formaður gengur úr eftir eitt ár, annar meðstjórnandi eftir hlutkesti eftir 2 ár. Síðan helst sama röð. Enginn atkvæðisbær félagsmaður getur skorast undan kosningu, nema lögmæt forföll hamli, eða hann hafi verið 3 ár í stjórn.

9. des.

Stjórnin hefur á hendi umsjón með öllum framkvæmdum félagsins milli aðalfunda. Hún ræður veiðistjóra og klakstjóra og gerir við þá samninga um kaup og önnur kjör, enda samþykki lögmætur félagsfundur þá samninga. Hún hefur eftirlit með því að samþykkt félagsins sé hlýtt, og má ráða menn sér til aðstoðar, þó án kostnaðar fyrir félagið.

Formaður er fulltrúi félagsins út á við og hefur yfirumsjón með störfum félagsins og fjárreiðum þess öllum. Afl atkvæða ræður úrslitum mála á félagsfundum.

10. gr.

Aðalfund heldur félagið í janúarmánuði ár hvert. Aðalfundur er lögmætur:

- a. ef hann er boðaður skriflega með minnst þriggja daga fyrirvara og sé fundar-efnis getið í fundarboði;
- b. sé meiri hluti stjórnar mættur á fundinum og helmingur félagsmanna.
- c. Nú er aðalfundur ekki lögmætur og skal þá boða til hans á ný með minnst þriggja daga fyrirvara, og er þá fundurinn ávallt lögmætur.

Á aðalfundi skýrir stjórnin frá störfum félagsins á liðnu starfsári, leggur fram áætlun og tillögur um starfsemi þess á næsta ári. Þar leggur hún og fram endurskoðaða reikninga félagsins og úrskurðar fundurinn um þá. Aðalfundur kys stjórn og tvo endurskoðendur félagsreikninga. Hann kveður á um laun stjórnar og annarra starfsmanna félagsins. Afl atkvæða ræður úrslitum mála á fundum, nema um breytingar á samþykktum sé að ræða eða félagsslit.

11. gr.

Aukafundi heldur stjórnin þegar henni þykir ástæða til, eða ef $\frac{1}{4}$ félagsmanna æskir þess og tilgreinir fundarefni.

12. gr.

Reikningsár félagsins er almanaksárið. Skulu reikningar fullgerðir fyrir aðalfund og lagðir þar fram endurskoðaðir til úrskurðar.

13. gr.

Arði af sameiginlegri veiði, svo og öllum gjöldum, er af starfsemi þess leiða, skal skipt niður á félagsmenn samkvæmt arðskrá, sem lögmætur fundur samþykkir og undirrituð er af $\frac{2}{3}$ félagsmanna. Gildir hún til 5 ára í senn. Náist ekki samkomulag um nýja arðskrá, að þeim tíma liðnum, gildir gamla arðskráin áfram.

14. gr.

Eigi má úthluta arði samkv. 13. gr. fyrr en eftir aðalfund, enda sé tekjuafgangur á ársreikningi. Verði útgjöld meiri en tekjur, skal jafna þeim niður á félagsmenn eftir þeim hlutföllum, er arðskrá ákveður.

15. gr.

Brot á samþykkt þessari varða sektum frá 100—500 kr. og veiði eða andvirði hennar gert upptæk og renni í félagssjóð.

16. gr.

Samþykkt þessari verður ekki breytt, nema $\frac{2}{3}$ mætttra félagsmanna á aðalfundi samþykki breytinguna, og $\frac{3}{4}$ félagsmanna eru mættir.

17. gr.

Félaginu má slíta ef $\frac{2}{3}$ félagsmanna samþykkja það.

222

9. des.

Samþykkt þessi staðfestist hér með samkvæmt lögum nr. 112 9. október 1941, til að öðlast gildi þegar í stað og birtist til eftirbreytni öllum þeim, sem hlut eiga að máli.

Atvinnu- og samgöngumálaráðuneytið, 9. desember 1943.

Vilhjálmur Þór.

Gunnl. E. Briem.

SAMÞYKKT

223

13. des.

fyrir Sparisjóð Vestur-Húnavatnssýslu á Hvammstanga.

1. gr.

Sjóðurinn heitir Sparisjóður Vestur-Húnavatnssýslu, og skal heimili hans og varnarþing vera á Hvammstanga.

2. gr.

Sparisjóðurinn er eign Vestur-Húnavatnssýslu, og stendur undir umsjón sýslunefndar.

Sýslunefndin hefur fyrir hönd sýslufélagsins ábyrgð á sjóðnum og er það, auk varasjóðs sparisjóðsins, trygging fyrir því að sjóðurinn standi í skilum.

3. gr.

Sýslunefndin kýs 3 menn í stjórn sparisjóðsins, og semur um þóknun til þeirra. Kosið skal til eins árs í senn, og gildir kosningin frá 1. júní til jafnlengdar næsta ár.

Enn fremur ræður sýslunefndin starfsmenn sparisjóðsins, bókara og gjaldkera og semur um laun þeirra.

Heimilt er að meðstjórnendur stjórnarinnar og starfsmenn sjóðsins séu sömu menn.

Deyi stjórnarnefndarmaður, eða verði á löglegan hátt óhæfur til að gegna starfinu, skal tafarlaust beiðast þess að sýslunefnd kjósi annan í hans stað. Þó er sýslumanni heimilt, í samráði við endurskoðendur, að skipa mann til starfsins, fyrir þann tíma, sem eftir er af kjörtímabilinu.

4. gr.

Birta skal í blaði því, sem flytur stjórnarvaldaauglýsingar, hverjir séu stjórnendur sjóðsins og starfsmenn, og hverjir geti undirritað kvittanir og aðrar yfirlýsingar, svo að skuldbindandi sé fyrir sjóðinn gagnvart viðskiptamönnum hans.

Stjórnendur sjóðsins bera, einn fyrir alla og allir fyrir einn, ábyrgð á því, að ekkert af fé sjóðsins fari forgörðum fyrir hirðuleysi. Tapist eitthvað af fé sjóðsins fyrir handvömm eða óráðvendni sparisjóðsstjórnarinnar eða einhverra starfsmanna sjóðsins, endurskoðunarmanna eða annarra, sem við hann eru riðnir, skal hlutaðeigendum skylt að bæta skaðann, ef krafist er, og sæti auk þess hegningu, eins og lög standa til um sýslunarmenn hins opinbera.

5. gr.

Stjórnendur sjóðsins og starfsmenn mega ekki sjálfir taka lán úr sjóðnum. Eigi mega þeir heldur ábyrgjast lán úr honum fyrir aðra.